

攝大乘論釋卷第八

交八

世親菩薩造

隋天竺三藏達摩笈多譯

釋增上戒學勝相勝語第六

論曰如是說因果修差別已此中增上戒勝

相云何可見如經說菩薩地中諸菩薩所受

禁戒若略說有四種勝相故名勝相應知謂

差別勝相共不共學處勝相曠大勝相甚深

勝相此中差別勝相者謂守護戒攝善法戒

利益衆生戒故於中守護戒是餘二戒住處

應知攝善法戒是出生佛法住處利益衆生

戒是成熟衆生住處應知共學者聲聞及菩

薩等性罪不行故不共學者謂遮罪不行故

此學處或於聲聞是犯菩薩非犯或有於菩

薩是犯聲聞非犯菩薩學處謂身口意聲聞

學處謂唯身口是故菩薩心亦是犯非餘聲聞等略說但是攝受一切衆生無罪過身口意業菩薩一切所應行者於彼皆應學之即是共不共學處應知

釋曰云何得知菩薩學處與聲聞差別言品類差別者由聲聞等唯有一守護戒無攝善法戒及利益衆生戒共不共學處戒者於中性罪謂殺生等是為共掘地斷草等制罪是不共此後學處於聲聞有罪菩薩無罪如聲聞於夏中行是犯菩薩見有衆生利益事不去是犯攝受一切衆生無罪過者攝一切衆生而無罪過非如以女色等與之雖是攝受然非無罪過業為離此過故應說以無罪過攝故心亦是犯者如害覺等但起覺時即是菩薩罪非聲聞故此增上戒等三學即是波

羅蜜體性何故復更建立三學此與波羅蜜差別義今當顯示由展轉相因故別立諸學處依戒故生定依定故生慧

論曰曠大差別者復有四種曠大故一種種無量學曠大二攝無量福德曠大三攝一切衆生利樂心曠大四阿耨多羅三藐三菩提住處曠大

釋曰種種無量學處曠大者謂菩薩學處亦種種亦無量以於衆生行教化及作攝事故攝無量福德者由攝諸菩薩福德資糧不可測量聲聞不爾攝一切衆生利樂意者於中勸令修善是利益意此人以此善故若於果時當得福報此名安樂意阿耨多羅三藐三菩提住處曠大者阿耨多羅三藐三菩提住此戒而得聲聞戒不爾

論曰甚深差別者若菩薩以如是等方便善巧行殺生等十種惡業然不得罪生無量福疾證阿耨多羅三藐三菩提又變化身口業應知是菩薩甚深戒或爲國王顯示種種逼惱衆生事以比成立衆生於律行中又種種本生中示現故顯示逼惱餘衆生攝受餘衆生故先令他心生淨信然後教化成熟此名菩薩戒甚深戒勝相此四種勝相略說菩薩守護戒勝相應知如是等菩薩學處差別復有無量種差別如毗那耶瞿沙方廣經中說釋曰甚深差別中若菩薩以如是等善巧方便者此中如是菩薩得如是善巧方便勢力今當顯示若如是知此人以此不善與無間地獄相應菩薩以知他心智知更無餘別方便能轉其惡業令不決定墮惡道知決定作

此業已必墮地獄如是知已即起此心設令我作業已墮於地獄去亦何苦殺之雖現世少受苦惱未來當受安樂是故猶如醫師菩薩以利益心殺之無罪得大勝福由此福德故疾得阿耨多羅三藐三菩提如是等行最為甚深又復菩薩有變化身口業應知是甚深戒由此故或為國王示現種種逼惱衆生事安立衆生於律行中於中所化體相為變化如阿那羅王為善財童子示現事種種本生中示現者如毗輸安怛囉王子此云多能即是獺也本生經中說菩薩以兒施婆羅門此兒是變化何以故論云顯示不逼惱此衆生攝受餘衆生故以菩薩終不以逼惱此衆生作攝受餘衆生事此亦是甚深此等四種差別即於毗那耶瞿沙十萬偈經中廣說釋增上

### 戒學竟

釋增上心學勝相勝語第七

論曰如是已說增上戒學勝相增上心學勝相云何可見略說有六種差別應知一所緣差別二種種差別三對治差別四功能差別五出生差別六作業差別大乘法為所緣故大乘光明一切福德聚三昧王賢護首楞伽摩等三摩提種種無量故一切法總相緣智如以楔出楔方便推出阿黎耶識中染濁障故遊禪定樂隨所欲受生故於一切世界中出生無障礙神通故謂震動故熾然故普徧故顯現故轉變故往來故延促故聚散故一切色像入身中故所往同類故隱顯故所為自在故伏他神通故與辯故與念故與樂故放光故出生如是等大神通故

釋曰今顯增上心學勝相於中大乘法為所緣者由諸菩薩以大乘法為所緣非諸聲聞等大乘光明福聚三摩提王等者顯三摩提名以諸聲聞於此種種三摩提中無有一種故對治差別者由能對治一切障礙故如以細物推出麤物如是煩惱種子於阿黎耶識中住名為熏習此說為麤對治道說為細推出彼麤故功能差別者由有此功能故遊禪定樂然有利益一切眾生處於彼受生亦不失禪定聲聞不爾出生差別者於一切世界中得無障礙神通由禪定生故作業差別者於中震動者震動一切世界故燒然者即是燒然一切世界普徧者應知光明徧滿故顯現者若眾生隨所應見以菩薩神通力故得見無量世界及見彼世界中諸佛菩薩等故

文八

五

轉變者如轉地等為水等應知往來者一刹那間往無量世界於此刹那間即還來故聚者以無量世界入一微塵中然不增長故散者以此一微塵普徧無量世界故一切色像入身中者如於一身中一切無量種種色像顯現故所往同類者如往三十三天色像音聲皆與彼同為教化彼故如是往一切處皆爾隱顯者即於一切處或現或不現故所為自在者如變魔王令作佛身等故伏他神通者於一切神通中得最勝故與辯者令能答問故與念及與樂者由聽菩薩說法故得三摩提故得念得樂放光者放光令他世界住菩薩皆悉來集故出生如是等大神通者此前所說神通大故此等神通聲聞所無故論曰攝一切難行由出生十種難行故十種

難行者所謂自受難行自受菩提願故不退  
難行於生死苦中不退轉故不背難行於一  
切顛倒行衆生不棄背故現前難行若諸衆  
生觸惱菩薩亦現前作一切利益事故不汙  
難行生在世間而不爲世法所汙故信樂難  
行於大乘中雖復未解然於一切甚深廣大  
生信樂故通達難行通達人法二無我故隨  
覺難行於如來所說甚深祕密語中隨順覺  
知故不離不染難行不捨生死而不染故起  
作難行諸佛於一切障礙解脫中住以無功  
用盡生死際起作一切衆生一切利益事故  
釋曰如經說菩薩有難行於中何者是難行  
彼一切難行以此十種難行顯示於中不離  
不染難行者不離者不捨義若於生死不捨  
亦不染此爲甚難餘九種難行論本可解

文八

六

論曰於隨覺難行中諸佛何等密語中菩薩  
隨順覺知如說云何菩薩得成布施若不施  
一物然於十方世界中成就無量布施事云  
何得成布施樂欲若於一切布施無所樂欲  
云何得成施信若於諸如來不行信向云何  
得成布施策發若自身於布施無所策發云  
何得成布施遊戲若無有一時布施一物云  
何得成布施廣大若於布施生不牢想云何  
得成布施清淨若生慳心云何得成布施究  
竟若不住於究竟中云何得成施自在若於  
施不得自在云何得成布施無盡若不住無  
盡中如施如是持戒乃至智慧皆爾隨其相  
應應知

釋曰此中顯示密語意於中云何得成布施  
者菩薩取一切衆生爲己體是故一切衆生

行施即是菩薩行施此是密意云何得成布施樂欲者謂不樂欲有所得施但樂欲菩薩淨施離相及著相是名有所得是故經說有離相著相布施云何得成施信者由自得施心故不藉他為緣云何得成施策發者此亦顯自性能施若自身無所策發由慳除故雖不策發自能行施云何得成布施遊戲者非一時施常施故不施一物一切施故云何得成布施寬大者於中不牢者若取秘密義名為不亂此為顯定心施及破貪欲施云何得成布施清淨者於中生起者若取秘密義名為拔根謂拔出慳根由迴慳首在下拔根在上故名生起云何得成布施究竟者究竟者名涅槃於中不住故非如聲聞住究竟涅槃云何得成施自在者若於施障中令不得自

在故名於施得自在以但於施障不得自在故云何得成施無盡者無盡即是涅槃為顯不同聲聞住涅槃故  
論曰云何得成殺生若斷衆生生死云何得成不與取者若一切衆生無有與者而自取之云何得成欲邪行若於欲邪中行故云何得成妄語若於虛妄中說為虛妄云何得成破壞語若於第一空行中常行故云何得成麤惡語謂住應知彼岸故云何得成雜亂語若於差別種類法中如其相說故云何得成非分貪若於無上禪定數習令自得故云何得成瞋害心若於一切煩惱心已得殺害故云何得成邪見於一切處徧行邪體如其體見故  
釋曰如經中說佛言比丘我為殺生者今當

顯示此說意云何欲邪行者若念知此欲是邪如是行故住應知彼岸者謂於應知彼岸中住故云何邪見者於色等徧行邪體如其相見故即是見依他性中分別性是邪相餘十不善業道義如論可解

論曰甚深佛法者何者為甚深佛法今當解說常住法是佛法法身常住故斷滅法是佛法一切障皆斷滅故生起法是佛法化身生起故證見法是佛法眾生八萬四千行并對治皆證見故欲俱法是佛法欲俱眾生攝同自體故如是瞋俱法是佛法癡俱法是佛法凡夫法是佛法應知無染法是佛法成就真如一切不汙故不汙法是佛法生在世間不為世法所汙故是故名為甚深佛法為修波羅蜜為成熟眾生為清淨佛刹為出生一切

佛法等故是菩薩三摩提業差別應知

釋曰復有餘經中說常住法是佛法乃至無染法是佛法等者此中說意今當顯示常住者謂法身以此法故說為常住法斷滅法證見法不汙法者此等為顯出離一切障染真如以此法故說不汙法前不說作業差別是故今當顯示菩薩三摩提業此中菩薩依止三摩提故得修諸波羅蜜亦以依止三摩提故成熟眾生由神通故攝引令入亦依止三摩提力清淨佛刹亦爾若心得自在即隨所欲令世界成金等如是等由三摩提力故出生佛法是名為業釋增上心學竟

釋增上慧學勝相勝語第八之一

論曰如是已說增上心學勝相增上慧學勝相云何可見謂無分別智若自性若依止若

因緣若所緣若相貌若建立若釋難若住持若伴類若果報若津液若出離若至究竟若方便無分別後得等功德若差別若無分別智譬喻若無功用作所應作若甚深等此是無分別智增上慧差別應知

釋曰今當說增上慧學勝相此中顯無分別智是增上慧此智復有三種一方便無分別即是尋思二無分別三後得於中求欲智是初增上慧自內智是第二增上慧攝持智是第三增上慧於中唯成就無分別智為正體由於尋思因智即是彼果故由於後得果智即是彼因故若此智成就前後二智即得成就今應先釋無分別智自性自性即是體相諸菩薩無分別智自性應離五種相今當說

論曰此無分別智自性離五種相離非思惟故離過覺觀地故離滅受想定故離色自性故離計度真實義種種相故離此等五種相是無分別智應知

釋曰五種相中若不作意是無分別者則重睡耽姪極醉等應是無分別智復次若過覺觀地是無分別者則二禪已上皆應是無分別智若爾世間人亦應得無分別智復次若心及心法不行故是無分別智者住滅受想定等應是無分別智此智不成何以故以住滅定等時無有心故復次若智體性如色者如色頑鈍無知智亦如是頑鈍無知復次若於真實義中取種種相是無分別者此取即是分別以分別言此是真實故若智離此五種相緣真實義於真實義中若不起種種相

言此是真實此是無分別智相故緣真實義  
時如眼識緣色無種種相比是其義

論曰此中為成立如所說無分別智故說偈

諸菩薩自性 出離五種相 是無分別智

於真不計度 諸菩薩依止 非思亦是思

是無分別智 非思義種類 諸菩薩因緣

有意言聞熏 是無分別智 正思惟相應

諸菩薩所緣 不可言說法 是無分別智

無我及真如 諸菩薩相貌 於彼所緣中

是無分別智 爾焰無有相 相應自性義

所分別非餘 字字相應故 是為義相應

若離於言說 於義智不生 言說不同故

一切不可言 諸菩薩住持 即無分別智

後得智中行 得增長進趣 諸菩薩伴助

說為二種道 是無分別智 五度之種類

交八

十一

諸菩薩果報 諸佛二輪中 是無分別智

方便及正得 諸菩薩津液 於後生生中

是無分別智 自體轉勝故 諸菩薩出離

得成就相應 是無分別智 應知十地中

諸菩薩究竟 由得三身淨 是無分別智

得最上自在 如虛空不染 此無分別智

種種極惡業 唯信決定故 如虛空不染

此無分別智 解脫一切障 得成就相應

如虛空不染 此無分別智 常行於世間

世間法不染 如瘧求受塵 如瘧正受塵

如非瘧受塵 三智如是說 如愚求受塵

如愚正受塵 如非愚受塵 三智如是說

如五求受塵 如五正受塵 如意識受塵

三智如是說 如未求解 如知法及義

三智次第爾 當知方便等 如人正閉目

是無分別智 即彼開目時 是為後得智

此無分別智 應知如虛空 如空中色像

後得智亦爾 如摩尼天樂 作業離分別

諸佛種種業 亦常離分別 非此亦非餘

非智亦是智 與爾焰無別 是無分別智

由說一切法 自性離分別 所分別非有

無無分別智

釋曰此初偈中即顯此義即此所說自性由

依止故得生今當說由說此智為無分別故

此智必應依止心生若依止心生由能思念

故名為心若依止思念生則無分別義不成

又若依止非心生則不成智為離此二過故

偈說諸菩薩依止等於中此智所依止非思

何以故以不思量義故又此所依止亦非非

思何以故以思所引生故此所依止生時是

十二

文八

十二

思種類故得說名思又此智由因所生起故

次以偈顯示其因諸菩薩因緣有意言聞熏

者由於他音聲正聞熏習以此熏習為因生

思惟意言名正思惟此智以何為所緣復以

偈顯示諸菩薩所緣等者於中不可言法性

謂於分別性一切法不可言復次何法不可

說謂無我真如人法體分別性無我此無體

之體名為真如莫作斷取又此所緣有何相

貌次以偈顯示諸菩薩相貌等者於中無相

者此智與真如平等而生無有別相為相此

是相貌如眼取色於中見青等相貌與色無

異此亦如是智與真如無異相貌若所有一

切法皆不可說何者為所分別相應自性義

所分別非餘故與彼不別故名非餘復次此

云何成為成就此故偈言字字自相應是為

十二

義相應者若此字與彼字相應說此中義名和合義如所芻二字不斷說故即有眼義和合生研芻此云眼是所分別以何道理成就一切法不可說若離於言說於義智不生故如有人未識能說名於所說義智則不生若汝言但得能說名則知所說義者此義不成如偈言言說不同故以能說名與所說義不同名與義各別體故偈言一切不可說由此義故能說與所說俱不可說復次此無分別智何所住持偈言諸菩薩住持即無分別智後得智中行者由無分別後所得智故菩薩得修諸行即依此智得增長進趣菩薩所有諸行此增長義依無分別智住持故復次此智以何為伴偈言諸菩薩伴助說為二種道故此無分別智以五波羅蜜為伴助於中道有二

種謂資糧道及依止道資糧道者謂施戒忍精進等諸波羅蜜依止道者謂禪波羅蜜由如前說諸波羅蜜所生善根及依止禪定故無分別智得生此智即是般若波羅蜜復次乃至未得佛果已來所有無分別智能成熟果報偈言諸菩薩果報諸佛二輪中是無分別智者何者諸佛二輪謂受用身輪及化身輪若修方便無分別能成熟化身果若正得無分別能成熟受用身果為顯示此義故偈言方便及正得復次何者是無分別智津液諸菩薩津液於後生生中者即於彼二輪中於後後生處此無分別智體轉得勝進即此無分別智轉勝進時此是津液果應知復次云何出離諸菩薩出離者究竟名出離即是涅槃得成就相應此無分別智者此智初得

相應從此經無量百千劫得成就相應應知  
十地中者從初地乃至第十地如是次第初  
地中唯有得相應爾後無量時得成就相應  
是故諸菩薩於三阿僧祇劫得涅槃由經爾  
所時乃得究竟故何者無分別究竟即次前  
所說得者是偈言交六諸菩薩究竟由得三身淨  
是無分別智者此中三身清淨者由此三身  
初地中唯有得於十地中得善清淨故得最  
上自在者此無分別智非唯清淨三身得究  
竟復有十種自在如後說彼亦是得應知復  
次無分別智有何功德於中有三種無分別  
一方便無分別二根本無分別三後得無分  
別此中方便無分別者由此人初於他所聞  
菩薩無分別已自未見其方便然生信樂依  
止此信樂修無分別觀此時名方便無分別

由此觀行故無分別得生故得無分別名此  
方便無分別無染功德譬如何等偈言如虛  
空不染此無分別智故為顯示何法無染故  
說種種極惡業為顯示不染因故說唯信決  
定故由於此無分別唯信決定故能對治惡  
趣此即顯示諸惡不染根本無分別功德復  
何所以偈言如虛空無染此無分別智故何  
法不染謂一切障礙何故不染得成就相應  
故顯示於諸地中由得相應及成就相應為  
因故此即顯示對治一切障交八無分別後得智  
功德復何所以偈言如虛空不染此無分別  
智常行於世間世法不能染故由此智力故  
見有利益眾生處隨念往生雖生世間然不  
為世法所染世法有八種謂得利不得利好  
名惡名毀讚苦樂等此即是無分別從無分

別智生故今當顯示此三智差別如其相應  
知如瘧求受塵無有言說方便無分別亦爾  
如瘧正受塵無有言說根本無分別亦爾如  
非瘧受塵如所受塵即有言說無分別後得  
亦爾名字等名為言說如愚求受塵者未曾  
識知名愚此愚等譬三智如瘧中說如五求  
受塵者無分別五種應知是眼等五數此等  
求覓及正受此譬三智一切如瘧中說如意  
識受塵者如意識於塵能分別亦受用後得  
亦爾於塵亦分別亦受用如未解論求解方  
便無分別亦爾如誦習論時但受用於法根  
本無分別亦爾法者謂文字如解論者於法  
於義皆受用後得亦爾應知復次為攝此法  
及義故顯示二智如人正閉目者此偈顯示  
無分別及後得二種差別相如虛空者如虛

空無染無有分別亦不為他所分別無分別  
智亦爾徧在一切法一味空中一切法不能  
汙故名無染自體無分別故名無分別亦不  
為他分別成相貌故非所分別此智如是應  
知如空中色像後得智亦爾者如色顯現亦  
是能分別亦是所分別復次若以無分別智  
名為佛者既離分別眾生云何得成利益眾  
生事雖離分別如理得成故以摩尼天樂譬  
喻偈顯示如摩尼天樂者如如意珠離分別  
業隨眾生所欲作利益事又如天樂無有作  
者隨彼天所欲出種種聲諸佛亦爾離於分  
別而種種事成應知此無分別甚深說中云  
何為智緣依他性所分別物為有別緣若爾  
何過若分別所攀緣則不得名無分別若言  
有別攀緣此別攀緣亦非有非此亦非餘者

於中非此者以非分別所能緣以無分別故亦非餘者以即於依他性法中作法如攀緣故此法及法如二種不可說一不可說異故此亦爾不可說為分別所緣又不可說為異緣故復云何此為是智為非智若爾何過若是智既名為智云何不分別若非智自性云何說為無分別智故以非智亦是智偈顯示此不可為智何以故由方便有分別智自性中不生故亦非非智以方便有分別智為因生故復有別義非即亦非異非智亦是智者由非即緣分別中生故名非智亦非異由即緣法如中生故非非智即以前句釋後句與爾焰無別是無分別智者非如方便智有能取所取生故名無分別若於所取爾焰中無別異平等平等生是無分別此智不住能取

文八

十七

所取中世尊於修多羅中說一切法無分別此中欲顯示此無分別故更說偈由說一切法自性離分別者謂一切法即自性無分別何故如此偈言所分別非有以此顯示由所分別物非有故若所分別非有故即一切法自性無分別者何故一切衆生不即得解脫無分別智者即以此句顯示不得解脫雖一切法自性無分別由一切法自性無分別故無有所分別若於此中通達智生證見此無分別故得解脫若通達智不生即不得解脫所說無分別智即此智有三分今當顯示

攝大乘論釋卷第八

音釋

楔先結切  
也職畧  
斫芻憲俞切